

ЎЗБЕКИСТОН RESPUBLIKASI VAZIRLAR MAҲKAMASINING
ҚАРОРИ

226 Ижро ҳужжатлари бўйича ундирувни Ўзбекистон Республикасининг Давлат бюджети маблағларига ва бюджет ташкилотларининг молиявий мажбуриятларига қаратиш тартиби тўғрисидаги низомни тасдиқлаш ҳақида

Ўзбекистон Республикаси Бюджет кодексининг 128 ва 129-моддаларига ҳамда «Суд ҳужжатлари ва бошқа органлар ҳужжатларини ижро этиш тўғрисида»ги Ўзбекистон Республикаси Қонунининг 48⁷-моддасига мувофиқ Вазирлар Маҳкамаси **қарор қилади:**

1. Ижро ҳужжатлари бўйича ундирувни Ўзбекистон Республикасининг Давлат бюджети маблағларига ва бюджет ташкилотларининг молиявий мажбуриятларига қаратиш тартиби тўғрисидаги низом иловага мувофиқ тасдиқлансин.

2. Вазирликлар ва идоралар ўзлари қабул қилган норматив-ҳуқуқий ҳужжатларни бир ой муддатда ушбу қарорга мувофиқлаштирсинлар.

3. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари Р.С. Азимов зиммасига юклансин.

**Ўзбекистон Республикасининг
Бош вазири**

Ш. МИРЗИЁЕВ

Тошкент ш.,
2014 йил 13 май,
120-сон

Вазирлар Маҳкамасининг
2014 йил 13 майдаги 120-сон қарорига
ИЛОВА

**Ижро ҳужжатлари бўйича ундирувни Ўзбекистон
Республикасининг Давлат бюджети маблағларига ва
бюджет ташкилотларининг молиявий мажбуриятларига
қаратиш тартиби тўғрисида
НИЗОМ**

I. Умумий қоидалар

1. Ушбу Низом Ўзбекистон Республикаси Бюджет кодексининг 128 ва 129-моддаларига ҳамда «Суд ҳужжатлари ва бошқа органлар ҳужжатларини ижро этиш тўғрисида»ги Ўзбекистон Республикаси Қонунининг 48⁷-моддасига мувофиқ ижро ҳужжатлари бўйича ундирувни Ўзбекистон Республикаси Давлат бюджети ва бюджет ташкилотларининг маблағларига қаратиш тартибини белгилайди.

2. Ушбу Низомда қуйидаги тушунчалардан фойдаланилади:

бюджет ташкилоти — Ўзбекистон Республикасининг Давлат бюджети маблағлари ҳисобига таъминланадиган давлат функцияларини амалга ошириш учун давлат ҳокимияти органларининг қарорига кўра, белгиланган тартибда ташкил этилган нотижорат ташкилоти;

Ўзбекистон Республикасининг Давлат бюджети — давлатнинг давлат вазифалари ва функцияларини молиявий жиҳатдан таъминлаш учун мўлжалланган марказлаштирилган пул жамғармаси;

молиявий мажбуриятлар — бюджет ташкилотларида уларга пул маблағларини ўтказиш мажбуриятини юкловчи ҳужжатлар, шу жумладан ижро ҳужжатлари асосида пайдо бўладиган мажбуриятлар;

харажатлар сметаси — бюджет ташкилоти томонидан молия йили учун тузиладиган ва тасдиқланадиган, унинг учун назарда тутилган бюджетдан ажратиладиган маблағлар харажатлар моддалари бўйича акс эттириладиган ҳужжат;

бюджет ташкилотларининг бюджетдан ташқари жамғармалари — қонун ҳужжатларида назарда тутилган манбалар ҳисобидан бюджет ташкилоти тасарруфига тушадиган маблағлар;

ғазначилик бўлинмалари — Ўзбекистон Республикаси Молия вазирлиги Ғазначилиги, Қорақалповистон Республикаси, вилоятлар ва Тошкент шаҳри бўйича Ғазначилик бошқармалари, туманлар ва шаҳарлар бўйича Ғазначилик бўлинмалари.

3. Ижро ҳужжатлари бўйича Ўзбекистон Республикаси Давлат бюджети маблағларига ва бюджет ташкилотларининг молиявий мажбуриятлари бўйича ундирувни қаратиш, ушбу Низомда белгиланган хусусиятларни ҳисобга олган ҳолда, «Суд ҳужжатлари ва бошқа органлар ҳужжатларини ижро

этиш тўғрисида»ги Ўзбекистон Республикаси Қонунига мувофиқ, ижро ҳужжатида маблағларни Ўзбекистон Республикаси Давлат бюджетидан тўлаш тўғрисидаги талаб мавжуд бўлган ёхуд ижро ҳужжатида бюджет ташкилотлари қарздор сифатида кўрсатилган ҳолларда амалга оширилади.

4. Бюджет ташкилотининг — қарздорнинг молиявий мажбуриятлари бўйича ундирув, ижро ҳаракатларини амалга ошириш ҳаражатларини ҳисобга олган ҳолда, ижро ҳужжатларини ижро этиш учун зарур бўлган миқдорда ва ҳажмда қаратилади.

Бюджет ташкилотларидан ижро йиғимини ундиришга йўл қўйилмайди.

5. Ушбу Низом билан зиммасига суд қарорларини ижро этиш доирасидаги муайян мажбуриятлар ва ҳаракатларни бажариш юкланган давлат органлари ва мансабдор шахсларга суд тартибидан ёхуд шикоят қилиш ёки протест келтириш тартибидан ўзгача тарзда суд ҳужжатини ижро этмаслик, ижро этишни тўхтатиб туриш ёхуд ижро этишга бошқача тарзда тўсқинлик қилиш тақиқланади.

II. Ундирувни Ўзбекистон Республикаси Давлат бюджети маблағларига қаратиш

6. Ундирувни Ўзбекистон Республикаси Давлат бюджети маблағларига қаратишни назарда тутадиган ижро ҳужжатларини ижро этиш молия органлари томонидан тегишли бюджет маблағлари ҳисобидан амалга оширилади.

7. Ижро ҳужжатлари бўйича Ўзбекистон Республикаси Давлат бюджетидан маблағлар олиш учун ижро ҳужжатида кимнинг фойдасига бюджет маблағлари ўтказилиши назарда тутилган бўлса, ўша шахслар ёхуд унинг вакиллари (кейинги ўринларда ундирувчилар деб аталади) аризани:

агар ижро ҳужжатида маблағларни Ўзбекистон Республикасининг республика бюджетидан ундириш назарда тутилган бўлса — Ўзбекистон Республикаси Молия вазирлигига;

агар ижро ҳужжатида маблағларни Қорақалпоғистон Республикасининг республика бюджетидан, вилоятларнинг вилоят бюджетларидан ёки Тошкент шаҳрининг шаҳар бюджетидан ундириш назарда тутилган бўлса — Қорақалпоғистон Республикаси Молия вазирлигига, вилоятлар ва Тошкент шаҳар ҳокимликларининг молия бошқармаларига;

агар ижро ҳужжатида маблағларни туманлар ва шаҳарлар бюджетларидан ундириш назарда тутилган бўлса — туманлар ва шаҳарлар ҳокимликларининг молия бўлимларига;

агар ижро ҳужжатида пул маблағлари тўланиши керак бўлган бюджет даражаси кўрсатилмаган бўлса — ундирувчининг — жисмоний шахснинг яшаш жойи бўйича ёки ундирувчи — юридик шахс органининг жойлашган жойидаги туманлар ва шаҳарлар ҳокимликларининг молия бўлимларига тақдим этадилар.

Бунда Ўзбекистон Республикасининг республика бюджетидан назарда тутилаётган режали бюджет маблағлари мулкий ва маънавий зарарни қоплаш бўйича тўловларни амалга оширишнинг манбалари ҳисобланади (дав-

лат даромадига ўтказилган пул маблағлари ва мол-мулк қиймати суммалари бундан мустасно).

Аризага суднинг ёхуд ижро ҳужжатини берган бошқа органнинг муҳри билан тасдиқланган ижро ҳужжатининг асл нусхаси илова қилинади. Аризада унга Ўзбекистон Республикаси Давлат бюджетидан маблағлар ўтказилиши талаб этилаётган ундирувчининг банкдаги ҳисоб рақами реквизитлари кўрсатилган бўлиши лозим.

8. Тегишли молия органи қўйидаги ҳолларда ижро ҳужжатини ундирувчига ижро этмасдан қайтаради:

ариза ушбу Низомнинг 7-банди талаблари бузилган ҳолда тақдим этилганда ёхуд унга ижро ҳужжатининг асл нусхаси илова қилинмаганда;

ижро ҳужжати «Суд ҳужжатлари ва бошқа органлар ҳужжатларини ижро этиш тўғрисида»ги Ўзбекистон Республикаси Қонунининг 8-моддасида назарда тутилган талабларга мувофиқ бўлмаганда;

ижро ҳужжати «Суд ҳужжатлари ва бошқа органлар ҳужжатларини ижро этиш тўғрисида»ги Ўзбекистон Республикаси Қонунининг 27-моддасида назарда тутилган ижрога топшириш муддати ўтгандан кейин тақдим этилганда;

ижро ҳужжатини беришга асос бўлган суд ҳужжати ёки бошқа органнинг ҳужжати ёхуд қонунга кўра ижро ҳужжати бўлган бошқа ҳужжат қонуний кучга кирмаганда, бекор қилинганда ёки ҳақиқий эмас деб топилганда.

Ижро ҳужжатини ушбу бандда назарда тутилмаган асослар бўйича ижро этмасдан қайтаришга йўл қўйилмайди.

9. Ижро ҳужжатини ижро этмасдан қайтариш тўғрисидаги асосланган хат ариза тушган кундан бошлаб 3 кун мобайнида ундирувчига юборилади, унда ушбу Низомнинг 8-бандида назарда тутилган талаблардан қайси бири бузилганлиги мажбурий тартибда кўрсатилади.

Ижро ҳужжати ушбу Низомнинг 8-банди учинчи хат бошида кўрсатилган асос бўйича қайтарилган тақдирда, хатда «Суд ҳужжатлари ва бошқа органлар ҳужжатларини ижро этиш тўғрисида»ги Ўзбекистон Республикаси Қонунининг 8-моддасида назарда тутилган талаблардан қайси бири бузилганлиги ҳам кўрсатилади.

Ижро ҳужжатини аниқланган камчиликларни бартараф этиш учун қайтариш ундирувчи томонидан ушбу бузилишлар бартараф этилгандан кейин ижро ҳужжатини тегишли молия органига такроран тақдим этишга тўсқинлик қилмайди.

10. Ижро ҳужжатини ижро этмасдан қайтариш учун асослар мавжуд бўлмаган тақдирда, тегишли молия органи ариза тушган кундан бошлаб 30 кун мобайнида молиялаштириш манбаларини аниқлаш ва тегишли бюджет маблағларини ариза берувчининг банкдаги ҳисоб рақамига тўлаш чора-тадбирларини кўради. Айни бир вақтда, ариза берувчи ва суд ёки ижро ҳужжатини берган бошқа орган ижро ҳужжатини ижро этиш натижалари тўғрисида ёзма равишда хабардор қилинади.

Ундирувни Ўзбекистон Республикасининг Давлат бюджети маблағларига қаратишни назарда тутувчи ижро ҳужжатлари бўйича Ўзбекистон Республикасининг Давлат бюджети маблағлари ҳисобидан харажатларни молиялаштириш (тўлаш) Ўзбекистон Республикаси Молия вазирлиги томонидан белгиланган тартибда амалга оширилади.

11. Ижро ҳужжатининг ижросини тўхтатиб туриш, кечиктириш, бўлиб-бўлиб ижро этиш, ижро этиш усули ва тартибини ўзгартириш «Суд ҳужжатлари ва бошқа органлар ҳужжатларини ижро этиш тўғрисида»ги Ўзбекистон Республикаси Қонунида белгиланган тартибда амалга оширилади.

Ижро ҳужжатининг ижроси суд томонидан ёки ижро ҳужжати берган бошқа орган томонидан, шу жумладан суд ҳужжати ёки ижро ҳужжати юзасидан шикоят берилиши ёки протест келтирилиши муносабати билан тўхтатиб турилган тақдирда, ижро ҳужжати ижро этиш бўйича барча ҳаракатлар суд ёки ижро ҳужжати берган орган томонидан ижро этишни тиклаш тўғрисида қарор қабул қилингунга қадар тўхтатиб турилади. Бунда ушбу Низомнинг 10-бандида назарда тутилган муддатнинг ўтиши ҳам тўхтатиб турилади.

Ижро ҳужжати беришга асос бўлган суд ҳужжати ёки бошқа органнинг ҳужжати, ёхуд қонунга кўра ижро ҳужжати бўлган ҳужжат бекор қилинганда ёки ҳақиқий эмас деб топилганда тегишли молия органи ундирувчига Ўзбекистон Республикаси Давлат бюджетидан маблағлар тўлашни рад этиш тўғрисида хат жўнатади.

III. Бюджет ташкилотларининг молиявий мажбуриятлари бўйича ундирувни қаратиш

12. Бюджет ташкилотларининг молиявий мажбуриятлари бўйича ундирувни назарда тутувчи ижро ҳужжатларини мажбурий ижро этиш суд ижрочилари томонидан, ушбу Низомда назарда тутилган хусусиятларни ҳисобга олган ҳолда, суд ҳужжатларини ва бошқа органлар ҳужжатларини ижро этиш тўғрисидаги қонун ҳужжатларига мувофиқ амалга оширилади.

13. Ижро ҳужжатлари бўйича бюджет ташкилотларининг молиявий мажбуриятлари бўйича ундирув суд ижрочисининг қарори асосида, қарзни ва ижро этиш бўйича харажатларни тўлаш учун зарур бўлган миқдорда амалга оширилади.

14. Суд ижрочилари бюджет ташкилотларининг молиявий мажбуриятлари бўйича ундирувни назарда тутадиган ижро ҳужжатларини (суд ижрочисининг қарорини) тегишли вазначилик бўлинмаларига тақдим этадилар.

15. Бюджет ташкилотларининг молиявий мажбуриятлари бўйича ундирувни назарда тутувчи ижро ҳужжатларини ижро этиш:

биринчи навбатда бюджет ташкилотининг бюджетдан ташқари жамғармаси маблағлари ҳисобидан;

тўланиши лозим бўлган қарз бюджет ташкилотининг харажатлар сметаси бўйича харажатлар моддасига мувофиқ бўлганда — бюджетдан ажратилган маблағлар ҳажми доирасида амалга оширилади.

16. Ҳазначилик бўлинмаси суд ижрочисининг қарори олинган кундан бошлаб ўн кун муддатда:

бюджет ташкилотининг бюджет маблағлари бўйича харажатлар сметасининг тегишли моддаси бўйича ҳамда бюджетдан ташқари барча шахсий ғазна ҳисоб варақлари бўйича тўловларни ҳамда шартномаларни рўйхатдан ўтказишни вақтинча тўхтатади, шунингдек суд ижрочисининг қароридан назарда тутилган бюджет ташкилоти маблағларидан фойдаланиш юзасидан бошқа чекловларнинг ижросини таъминлайди;

бюджет ташкилотини, ижро ҳужжатини илова қилган ҳолда, тегишли харажатларнинг вақтинчалик тўхтатилганлиги тўғрисида ёзма равишда хабардор қилади;

бюджет ташкилотининг ғазначилик ҳисоб рақамидан — бюджет ташкилотининг бюджетдан ташқари жамғармаси маблағлари қолдиқлари доирасида, бюджет ташкилотининг бюджетдан ташқари жамғармасида маблағлар мавжуд бўлмаганда ёки етарли бўлмаганда ҳамда тўланиши керак бўлган қарзлар бюджет ташкилоти харажатлари сметаси бўйича харажатлар моддасига мувофиқ бўлганда эса — ажратилган бюджет маблағлари ҳажми доирасида маблағларнинг ўтказилишини таъминлайди.

17. Бюджет ташкилотларининг молиявий мажбуриятлари бўйича ундирувни назарда тутувчи ижро ҳужжатлари бўйича маблағларни тўлашга доир харажатларни молиялаштириш (тўлаш) Ўзбекистон Республикаси Молия вазирлиги томонидан белгиланган тартибда амалга оширилади.

18. Бюджет ташкилотининг бюджетдан ташқари маблағлари ва харажатлар сметасининг тегишли моддаси бўйича бюджетдан ажратилган маблағлар қолдиғи етарли бўлмаган тақдирда, ғазначилик бўлинмаси бюджет ташкилотига харажатлар сметасига тегишли ўзгартиришлар киритиш тўғрисида талабнома юборади. Бунда бюджет ташкилотларининг бюджетдан ташқари ғазначилик ҳисоб рақамлари бўйича, шунингдек бюджет ташкилотлари харажатлар сметасининг тегишли моддалари бўйича бундан буён юридик мажбуриятлар қабул қилиш бюджет ташкилотининг харажатлар сметасига ўзгартиришлар киритилгунгача ва суд ижрочисининг қарори асосида маблағлар тўлиқ тўлангунгача тўхтатиб турилади.

IV. Яқунловчи қоида

19. Суд ижрочилари, молия органлари ва ғазначилик бўлинмалари ходимлари ушбу Низом талабларининг қатъий бажарилиши юзасидан шахсан жавоб берадилар.